



Siverth K. Heilmann aamma Steen Lyng, ATASSUT  
Inatsisartunut ilaasortat  
/Maani

**§ 37 naapertorlugu apeqqummut nr. 2015-106-imut TELE-POST-imut tunngasumut akissuteqaat**

24-04-2015  
Sags nr. 2015-113879  
Dok. nr. 1935942

Asasara Siverth K. Heilmann aamma Steen Lyng,

Aallarniutigalugu apeqquteqaatissinnut qujarusuppunga.

Inatsisartut suleriaasianni § 37 naapertorlugu TELE-POST aammalu ammanerulersitsiniarnerup ingerlanneqarnera ingerlasoq pillugit arlalinnik Naalakkersuisunut apeqquteqarpusi. Apeqqutit uannut akineqartussanngorlugit innersuunneqarput.

Postboks 909  
3900 Nuuk  
Tlf.: (+299) 34 50 00  
Fax: (+299) 32 52 86  
E-mail: isan@nanoq.gl  
www.naalakkersuisut.gl

Apeqqutigisassi akissuteqarfiginissaannut Nalunaarasuartaateqarnermi Aqutsisoqarfimmut paasissutissanik piniarpugut.

Apeqquteqaatissinnut akissuteqaatikka matuma kinguliani ilissinnit taaneqartut tulleriaarnerat malillugu takuneqarsinnaapput.

**- Suna tunngavigalugu TeleGreenland-ip Telekkut sullissinermik namminersortunngorsaaneq piffissalingaanngitsumik unitsippaa, ukiumut million-erpassuarneq sinneqartoortuuaannarluni?**

Paasinninnera malillugu TELE-POST-ip ammanerulersitsinissaq piffissalingaanngitsumik kinguartinnikuunngilaa. TELE-POST ingerlaavartumik oqaloqatigisarpara aammalu ingerlatseqatigiiffiup ilisimatitsissutigaa, ingerlatseqatigiiffik ilaatigut attaveqaatinik ataatsimut atuinermut tunisassianik suliaqartuusussanut nutaanut pilersuiniarnerminni kinguaattoortoq, pissutigalugu suliaqarneq naatsorsuutigineqartunut naleqqiullugu annertunerujussuusimammat aammalu ingerlatseqatigiiffiup piffissamut pilersaarut nutaaq suliarigaa. Tamatumunnga nangissutigalugu uanga nalunaarasuartaateqarnermut peqqussummi § 10, imm. 1 naapertorlugu nalunaarasuartaateqarnermut suliaasaqarfimmi akisussaasutut TELE-POST-imut allakkannik nassiuussivunga, kinguaattoornermut tunngatillugu pisut erseqqinnerusumik nassuiaqqullugit aammalu ammanerulersitsiniarnermut suliap ingerlanerani pilersuinerminnut piffissamut pilersaarummik erseqqinnerusumik piumallunga.

**- TeleGreenland-ip politikikkut aaliangikkat qaqugu piviusunngussanersut aaliangigassarivaai?**

Naamik, taamatut isumaqanngilanga. Ineqarnermut, Sanaartornermut Attaveqarnermullu Naalakkersuisutut, nalunaarasuartaateqarnermut suliaasaqarfimmut allaffissornikkut politikikkullu akisussaasuuvunga. Taamaattumik ammanerulersitsinissamut suliap ingerlanerata ingerlanneqartup ingerlaqqinnissaanut politikikkut allaffissornikkullu killissaliussassat uanga aalajangersarpakka.

Taamaattoq isumaqarpunga TELE-POST-ip tamanna tamakkiisumik akuerigaa aammalu ammanerulersitsiniarnermut suliap ingerlanerani piffissaliussat malinniarlugit ingerlatseqatigiiffik sapinngisamik pitsaanerpaamik iliuseqartoq. Ingerlatseqatigiiffik ammanerulersitsiniarnermut suliap ingerlanerani pilersuinermini kinguaattoorpoq, kisianni tamatumunnga pissutissaqarluarsinnaavoq.

Tamatumunnga nangissutigalugu nalunaarasuartaateqarnermut peqqussummi § 10, imm. 1 naapertorlugu, suliami matumani pingaaruteqartunik tamaginnik ilisimatittaqqullunga, TELE-POST-imi pisortaaqatigiit allakkatigut peqqakka, ilanngullugu piffissamut pilersaarummik nutaamik saqqummiusseqqullugit.

**- *TeleGreenland-i politikikkut aaliangikkat qatangiinnarlugit suliat ingerlareersut unitsissinnaavai?***

Naamik, isumaqanngilanga TELE-POST-ip politikikkut aalajangiinerit kinguartinnissaannut piginnaatitaaffeqartoq. TELE-POST-ip maleruagassat, anguniakkat malittarisassallu, kisermaassisussaataaertermut, ingerlatsinissamut akuersissummut aamma nalunaarasuartaateqarnermut suliassaqaarfimmi ammanerulersitsiniarnermut politikikkut aalajangersaavigineqartut malittussaavai.

Taamaattoq isumaqanngilanga TELE-POST ammanerulersitsiniarnermut suliap ingerlanerata ingerlasup kinguartinnissaanik imaluunniit unitsinnissaanik siunertaqartoq. TELE-POST suliap ingerlanerani kinguaattoorpoq, kisianni tamatumunnga pissutissaqarluarsinnaalluarpoq, tassami ammanerulersitsiniarnermut suliap ingerlanera pisariuvoq aammalu TELE-POST-imut annertuumik piumasaqaateqarfiulluni.

Matuma siuliani akissuteqaatiga innersuussutigaa.

**- *TeleGreenland-ip siunnersortinut aningaasartuutai siunissamut aningaasaliinertut isigineqarsinnaanngillat?***

Aningaasartuutit nalunaarasuartaateqarnermut suliassaqaarfimmi, atorluarsinnaasumik unammilleqatigiinnikkut suliffeqaarfinnut aamma atuisunut iluaqutaasumik, inuiaqatigiinni sunniuteqarluartumik isumalluutininik atuinissamik qulakkeerinnissamut inuiaqatigiittut akiliklavut, nalunaarasuartaateqarnermut suliassaqaarfiup unammilleqatigiinneq nutaaliornerlu aqutugalugit sunniuteqarluarnerusumik ingerlaleranerani inuiaqatigiittut iluanaarutigisatsinnut ataqaatigiisillugit isigineqassasut isumaqarpunga.

Ammanerulersitsiniarnermi iluanaarutaasut siulliit pissarsiarereerpavut, tassami illoqarfiit nunaqarfiillu tamarmik sakkortusaavikkut attaveqaatinut attaveqartut, ammanerulersitsinerup malitsigisaanik akigititat appariartornerat/tunisassiat pitsaanerulernerat, misigilereerpaat.

Nalunaarasuartaateqarnermi Aqutsisoqarfiup 2012-imi attaveqaatinik ataatsimut atuinermut akigititanik maleruagassiinerata malitsigisaanik atuinerup annertusiartornerujussuata aammalu imaatigut kabelip atorneqarnerata annertusiartornerata kingunerisaannik sakkortusaavikkoortumik attaveqarfiusuni tamani internettimut kiffartuussissutinik pilersuinermut aningaasartuutit appariartorput. Nalunaarasuartaateqarnermi Aqutsisoqarfiup akigitigassaq TELE-POST-ip nammineerluni naatsorsugaasa 1/4-ata missaanut aalajangersarpaa, aammalu akigititaq tamatuma kingorna akigititassatut naatsorsorneqaqqaartup 1/8-iata missaanut apparteqqinneqarpoq.

Aningaasartuutit appariatornerat, TELE-POST-ip flatrate-mi tunisassianik nutaanik kiisalu tunisassianik ataatsimoortukkaani paasissutissanik annertunerusunik tiguisinnaasunik tunisassianik neqerooruteqarsinnaalerneranik ajornarunnaarsitsivoq. Taamaalilluni ammanerulersitsineq sullitanut illoqarfinni annertunerusuni najugaqartunuinnaangitsoq iluaqutaavoq, kisianni innuttaasut amerlanerpaartaannut pitsaasunik sunniuteqarluni.

Taamaattoq tamanna isumaqanngilaq ingerlatsinissamut akuersissummik peqartup siunnersortinik atuineranut isornartoqartitsissanngitsugut. Taamaattumik TELE-POST-imut saaffiginnissutinni ilaatigut ammanerulersitsiniarnermut suliap ingerlanerata kinguaattoornerinut nassuiaammik kiisalu ammanerulersitsiniarnermut atatillugu siunnersortinik ikiorteqarnermik atuinerup aamma attaveqaatinik ataatsimut atuinermi kiffartuussissutinik suliaqarnerup imminnut ataqatigiinnerannut nassuiaammik piumasaqarpunga.

Inussiarnersumik inuulluaqqusillunga

Knud Kristiansen